

SANT AMBRÖS

L'anno scorso è stata tolta dal campanile la statua di S. Ambrogio (era stata installata nel 1854) perché molto logorata dal tempo: si era staccato un braccio, caduto nella piazzetta sottostante.

Centcinquant ann e pàssa ... inscima al campanin,
'na man cul 'l pasturàal, quel'altra cu 'l früstìn
(e già ca sévat lì ... ligàa sott a brazzett
parfina un parafülmin ... par luntanà i saett).
Sü inscima ... a god la vista ... a t'è scapàa nagott
da quell ch'è sücedüü in tütt sto temp, dassott,
e mia dumà visin, i ropp dul nost paes,
ma anca püssée distant, in giò, ultra Vares.

N'hett vist e n'hett sentüü da tütt i qualità:
par primm i tò campann ... 'pena dassott, sunà
i agunij di mort, a festa pa' i funziun,
e quand i hann purtää via ... par diventà canun ...
T'he vist tanti fiö ... giügà sota da Ti,
ciamàa par fa la guera, quand gh'è tucàa parti.
T'he vist i mument bei, quand evan tücc cuntent,
e i giornàa püssée brütt, da dular e turment.

T'he sentüü cantà i gent quand gh'eva i prucessiun,
e anca malparoll, bestemm e imprecaziun,
e mò, in sti ültim temp ... robb ca fann mia piase
parchè già da 'n pù d'ann ... sa và innanz a 'nà indré:
e ... i gent sa vöran ben pü
in da sto mund, indua cumàndan
l'ambiziun, l'interess e i danée,
e 'l disübidi l'è diventaa un mistée...
... sott i pée la moràal e la léeg:
sfrusà i tass, rubatà, imbruià,
avegh pü da rispett par la cà,
la famiglia, la Gesa, la scöra
divertiss e fregassan da tücc
... e quij alt vàgan püür in d'un mücc ...

E Ti Sant Ambrös, nostar e da Milan
te saréssat stai bun...cun la tò früsta in man
da 'gni giò a indrizzà i malament e i sconquass!
... Ma Ti ... sett fai da sass
e 'l sù e l'aqua e 'l vent ... e i ann t'hann cunsümàa
... t'è saltàa via 'na man, da tant ca sétt cunsciàa!
E mò ... t'hann tiràa giò dul tütt.
Ma senza da Ti ul campanin l'è propi brütt!

Sant Ambrös ...torna sü ... nüñch ta specium !...

Natale Gorini